

# **He taonga te tamaiti**

**Mahere mahi akoranga kōhungahunga 2019-2029**

He whakarāpopototanga

<b>Mahere mahi akoranga kōhungahunga 2019-2029.....</b>	<b>1</b>
<b>Kōrero whakataki.....</b>	<b>4</b>
<b>Te Tiriti o Waitangi .....</b>	<b>4</b>
<b>Matakitenga.....</b>	<b>5</b>
<b>Te horopaki mō tēnei mahere mahi.....</b>	<b>5</b>
Whakaratonga kanorau .....	5
Tata ki te katoa o ngā tamariki kei te whai wāhi atu ki ngā ratonga akoranga kōhungahunga.....	5
He porihanga rerekē.....	5
Te kaupapa mō te panoni.....	5
<b>Ka aha ināianei? .....</b>	<b>6</b>
<b>Ngā whāinga o tēnei mahere .....</b>	<b>6</b>
Whāinga 1. Ka whai wheako ngā tamariki me ngā whānau ki ngā taiao e hāpai ana i tō rātau oranga me te tautoko i tō rātau tuakiri, reo me te ahurea.....	6
1.1 Te whakapai ake i te ōwehenga o ngā pakeke ki ngā tamariki i raro i te 3 tau i roto i ngā ratonga akoranga kōhungahunga e ārahina ana e ngā kaiako .....	6
1.2 Me here i ngā kaiako kia noho rite i waenga i ngā rōpū tamariki mā ngā āhuetanga e tautoko ana i te manaaki haumaruru me te ōrite, ngā huarahi ako reo me ngā whakawhitinga pai mō ngā tamariki me ngā whānau .....	7
1.3 Te waihanga tohutohu mō te rahi ā-rōpū, te hoahoa o te pokapū me ngā āhuetanga ā-taiao whānui ake, ā, me pēhea te whakapai ake i ngā paerewa kounga i ēnei wāhi .....	7
1.4 Te tautoko i ngā mātua me ngā whānau ki te whiriwhiri i ā rātau ara akoranga mātauranga me te reo mā te āhei atu ki ngā mōhiohio pai ake .....	7
Whāinga 2. Ka taea e ngā tamariki katoa te whai wāhi atu ki ngā akoranga kōhungahunga me te whai i ngā tautoko e hiahiatia ana e rātau ki te ako, ā, kia momoho .....	8
2.1 Te arotake i ngā tuku pūtea ōrite me te hāngai hei whakarite kia pai rawa te tautoko i ngā tamariki kia whai hua mai i ngā wheako akoranga kōhungahunga kounga tiketike .....	8
2.2 Te waihanga i ngā tohutohu ki te takawaenga i ngā ratonga hauora me te pāpori tauawhi hei tautoko i ngā tamariki me ō rātau whānau me te whakarite e marama ana kei a wai te kawenga mō te whakariterite i ngā tautoko akoranga kei ia ratonga akoranga kōhungahunga .....	8
Whāinga 3. He tino matatau, he kanorau, he mōhio hoki ngā kaimahi whakaako me ngā kaiako kaiārahi ki ngā tikanga, ka mutu e uaratia ana rātau .....	8
3.1 He whakapoapoa mō te 100 ōrau, ā, kia whakaritea mō te 80 ōrau o ngā kaiako whai tohu i roto i ngā pokapū whai kaiako, e eke ai te 100 ōrau .....	8
3.2 Te whakapiki i te taumata o ngā tohu kaiwhakaako ā-kāinga .....	9
3.3 Ka waihanga i tētahi rautaki puna kaiako o te akoranga kōhungahunga e hāngai ana ki te rautaki ohu mahi mātauranga whānui .....	9

3.4	Te whakatinana i tētahi tikanga ka whakapiki i ngā taumata me te ōritetanga o ngā utu ā-tau a ngā kaiako me ngā here puta noa i te rāngai akoranga kōhungahunga .....	9
3.5	Te whakapai ake i te mātauranga kaiako tīmata (ITE) hei whakarite kei te tino whai tohu ngā kaiako ki te whakatinana i te marautanga i te taha o ētahi atu ngaio.....	10
3.6	Te waihanga i tētahi ara pūmau, whakaraupapa hoki mō te whakawhanaketanga me te akoranga ngaio (PLD).....	10
3.7	Te waihanga i ngā pokapū auaha me te rangahau mō ngā ratonga akoranga kōhungahunga.....	10
3.8	Te tautoko i ngā ratonga akoranga kōhungahunga kia whai wāhi atu hei pātui tōkeke i roto i te mahi ngātahi puta noa i ngā ratonga me ngā rāngai.....	10
3.9	Te tautoko i te ohu mahi ki te whakauru mai i te reo Māori ki roto i ngā ratonga akoranga kōhungahunga katoa .....	10
Whāinga 4. Ka whakawhanake ngā tamariki i ngā pūmanawa e uaratia ana e ō rātau whānau me te hapori, ā, ka tautokona rātau kia noho hei ākongā mōhio, māia hoki .....		11
4.1	Kāhītitia te pou tarāwaho marautanga, <i>Te Whāriki</i> , hei tautoko i te whakamahi i ngā mātāpono, ngā aho, ngā ūnga me ngā putanga ina waihanga ana i ngā marautanga paetata .....	11
4.2	Te waihanga ngātahi i ngā tūmomo utauta tika, whaikiko, tōtika ā-ahurea me te reo hei waihanga, e ū ana ki ngā tikanga me te reo hei tautoko i ngā aromatawai whakawhanake me ngā tikanga whakaako .....	11
4.3	Mā ngā ratonga tautoko hei whakahaere i ngā arotakenga ā-roto pakari hei whakakaha ake i te hakatinanatanga o <i>Te Whāriki</i> me te whakarite kia pai haere tonu ai.....	11
Whāinga 5. Kei roto ngā ratonga akoranga kōhungahunga i tētahi pūnaha taiao mātauranga i whakaritea, he pipiri hoki kei te tautokona, he noho haepapa, he toitū hoki .....		12
5.1	Te whakauru i tētahi ara kōtuinga ka whakahaeretia hei whakarite i te tino kounga, te kanorau me te toitūtanga o te whakarātanga akoranga kōhungahunga .....	12
5.2	Te tautuhi i ngā kōwhiringa hei whakarite i te rato o ngā ratonga akoranga kōhungahunga i roto i ngā hapori kāore i tino whiwhi i ēnei.....	12
5.3	Te wehe mai i tētahi wāhi mō ngā ratonga akoranga kōhungahunga i te taha o ngā wāhi kura tuatahi, ina taea ana .....	12
5.4	Te whakakaha ake i ngā tautoko mā ngā poari, rōpū whakahaere hoki mō te reo o Te Moananui-a-Kiwa me ngā ratonga akoranga kōhungahunga.....	12
5.5	Te whakauru mai i tētahi kaupapa ōrite me te pakari mō te aroturuki me te tuku raihana.....	13
5.6	Te whakapai ake i te pūrangiaho tuku pūtea mā ngā mātua, ngā kaiako me te kāwanatanga .....	13
5.7	Te waihanga ngātahi i tētahi tauira tuku pūtea me Playcentre Aotearoa New Zealand.....	13
<b>Ka pēhea tā mātau aroturuki me te arotake i te anga whakamua? .....</b>		<b>13</b>
<b>He tirohanga poto ki te mahere mahi .....</b>		<b>14</b>

# Kōrero whakataki

I roto i te Rautaki Oranga Tamaiti me te Taiohi kua whakatakotohia e te Kāwanatanga te matakitenga nui a te Kāwanatanga "Kia noho ai ko Aotearoa te wāhi pai rawa i te ao mō ngā tamariki me ngā taiohi". He tūmanako tēnei matakitenga, ā, me ū tonu ngā whakapau kaha. He wāhanga hira te whai wāhi ki ngā akoranga kōhungahunga tino kounga mō te tautoko i te oranga me ngā whai wāhitanga o ngā ao o ngā tamariki.

E āhukahuka ana te Kāwanatanga kei runga kē te angitu o ngā ratonga akoranga kōhungahunga ki ngā poari whakahaere pai, ngā kaiārahi me ngā whakaakoranga pai, me te whakauru mai o ngā mātua, whānau me ngā hapori. Ko te angitu kei te whai wāhitanga anō o ngā mātua ki te kōwhiri i ngā ara akoranga whaitake mō ā rātau tamariki.

I te Paengawhāwhā 2018 i tohua e te Minita Mātauranga, te Hōnore Chris Hipkins, tētahi Rōpū Tohutohu a te Minita me tētahi Rōpū Tohutohu o te rāngai hei tuku i ngā tino tohutohu ki a ia mai i ngā tūmomo reo mō te anamata o te pūnaha akoranga kōhungahunga hei whakatairanga i ēnei āhukatanga angitu. Nā ēnei rōpū i hanga *He taonga te tamaiti: He mahere rautaki hukihuki mō ngā ratonga akoranga 2019-29* (mahere rautaki hukihuki) me ngā tautoko a Te Tāhuhu o te Mātauranga.

I haere ngā whakawhitiwhiti kōrero mō te mahere rautaki hukihuki mai i te 19 o Whiringa-ā-rangi 2018 ki te 15 o Poutūterangi 2019. Me kī, i takoto he whakaaetanga tiketike me ngā tūtohutanga o te mahere rautaki hukihuki. Ko ngā mea tino matua ko ngā tūtohutanga hei whakapai ake i ngā ōwehenga pakeke: tamaiti me te neke atu ki te 100 ōrau o ngā kaiako whai tohu i roto i ngā ratonga ā-kaiako. Kua whakarāpopototia ngā whakahokinga kōrero mai i ngā whakawhitiwhiti kōrero ki ngā pūrongo e rua: *Kōrero Mātauranga: He tātaritanga hukihuki o te tāpaetanga kōrero o te mahere rautaki mō ngā akoranga kōhungahunga, Paengawhāwhā 2019* me te *Ngā whakawhitiwhiti kōrero hukihuki o te mahere rautaki mō ngā akoranga kōhungahunga: Ngā hui me ngā mātua*.

He mea waihanga tēnei mahere, *He taonga te tamaiti: He mahere mahi hukihuki mō ngā akoranga kōhungahunga 2019-2029* (mahere mahi) mai i ngā whakahokinga kōrero mai i ēnei whakawhitiwhiti kōrero tūmatanui. He whakarāpopototanga tēnei o te mahere whakamutunga. Ka taea te pānui te mahere whānui, me te mahere whakarite mō te āta whakauru haere i te whakatinanatanga, ngā tatauranga, ngā tohutoro me ngā taipitopito whānui ake i [www.conversations.education.govt.nz](http://www.conversations.education.govt.nz)

# Te Tiriti o Waitangi

E pūmau ana te Kāwanatanga ki te whakamana i ngā paiherenga o te Karauna i puta ake i Te Tiriti o Waitangi. He whakamana i te motika o te whānau, hapū me te iwi ki te whakaatu i te umanga me te mana ki roto i te hoahoa me te whakarātonga o ngā pūnaha mātauranga, me te āhukahuka i tō rātau pānga kaupapa ture i roto i te whaitake o te pūnaha mō te Māori. E whakatakoto ana tēnei mahere mahi i ngā tikanga e tino mahi tahi ai te Kāwanatanga me te rāngai akoranga kōhungahunga ki te whakatipu i ngā mōhiotanga ā-ahurea o ngā kaiārahi, ngā kaiako me ngā kaiwhakaako i roto i ngā ratonga akoranga kōhungahunga.

I te wā i whakarewahia tēnei mahere mahi, kei te mahi te Karauna i te taha o Te Kōhanga Reo National Trust (TKRNT) ki te hoahoa ngātahi i tētahi taura tuku pūtea toitū e ū ana ki ngā kitenga a Te Rōpū Whakamana i Te Tiriti o Te Waitangi e pā ana ki te kerēme a Te Kōhanga Reo. He tino kaupapa hira Te Kōhanga Reo mō ngā mahi whakarauora i te reo me ngā tikanga Māori mā te tuku iho o ngā mōhiotanga mai i ngā pākeke ki ngā kōhungahunga me ō rātau whānau.

**He taonga te tamaiti: Mahere mahi akoranga kōhungahunga 2019-2029**

He whakarāpopototanga

# Matakitenga

*Ko tā te pūnaha akoranga kōhungahunga he whakarite kia tipu ora ai ia tamaiti i ngā wāhi pai rawa e hāpai ana i tōna whakapapa, i tōna reo me ngā tikanga, ā, he mea nui hoki aua wāhi ki ngā mātua me ngā whānau.*

Mā ngā ratonga akoranga kōhungahunga tino kounga e pai ai te ao o ngā tamariki, ka ako, ka momoho, ā, he whaitake mō te tautoko i te ōritetanga mai i te tīmatanga. He wāhanga hira anō mō te tautoko i ngā mātua me ngā whānau ina ko rātau ngā kaiako tuatahi o ā rātau tamariki.

## Te horopaki mō tēnei mahere mahi

### Whakaratonga kanorau

Kei roto i ngā ratonga akoranga kōhungahunga ko ngā ratonga mātauranga me te manaaki,<sup>1</sup> ngā kura pūhou, ngā kōhanga reo, ngā pokapū tākaro, ngā ratonga akoranga kōhungahunga ā-kāinga, ngā ratonga ā-hōhipera me ngā rōpū tākaro. He tūmomo hanganga rangatiratanga me te poari whakahaere ō ēnei ratonga akoranga kōhungahunga me te tuku i ngā kaupapa whakaaro, reo, tauira mahi hoki. He mea hira ngā whakaratonga kanorau i Aotearoa i te mea he tuku kōwhiringa ki ngā mātua me ngā whānau.

### Tata ki te katoa o ngā tamariki kei te whai wāhi atu ki ngā ratonga akoranga kōhungahunga

E ai ki ētahi atu tau maha ki mua, kei te tamariki atu te whakauru a ngā tamariki mai, ka mutu mō ngā haora roa ake. Ahakoa ehara tēnei i te whakature, tata ki te katoa o ngā tamariki 3 me te 4 tau kei roto i ngā wāhi akoranga kōhungahunga, ā, kei te nui haere kē atu e whakauru ana ki ngā ratonga mātauranga me te manaaki. Engari, e ai ki ngā raraunga a te Tāhuhu ko ngā tamariki nō ngā wāhi pōhara he iti ake ā rātau haora taetae atu i te wiki tēnā i te taupori whānui.

### He porihanga rerekē

He hōhonu te pānga o ngā ia porihanga ā-ao ki Aotearoa pērā i wāhi kē, pērā i te nui ake o te nekeneke haere, te nekehanga o te taupori, me ngā rerekētanga o te whakauru ki te ao tuku mahi. He nui ake te kanorau ā-mātāwaka o Aotearoa ināianei me te noho tuwhera ake ki ngā āhuetanga kanorau tēnā i ngā reanga o mua ake. Ko ngā tūmanako o ngā rōpū rerekē mō ngā ratonga akoranga kōhungahunga mō te āhua o te pāhekoheko o ngā ratonga ki ngā whānau me te whiriwhiri ngātahi i tētahi marautanga paetata.

Ahakoa he whenua rangatira a Aotearoa, kei roto tonu ētahi tamariki i te pōharatanga e noho ana, kāore he kāinga pūmau, kei roto rānei i ngā whānau e pēhia ana e ngā raruraru whānau matatini, raruraru hauora hoki. Kua piki haere te pānga mai o ngā mate hinengaro me ngā mate whanaketanga i roto i ngā tamariki.

### Te kaupapa mō te panoni

Kei te tautuhi tonu Te Tari Arotake Mātauranga (ERO) i te tāupetanga o ngā tikanga mahi. Kia whai hua ai ngā tamariki katoa, me mātua whakarato te pūnaha akoranga kōhungahunga i ngā wheako kounga tiketike puta noa i ngā momo ratonga rerekē e tino pai ai ki ngā mātua me ngā whānau. Ahakoa kua tino nui te tipu haere o ngā

---

<sup>1</sup> He huhua ngā ingoa o ngā ratonga mātauranga me te tiaki tamariki pērā i te crèche, kura pūhou, pokapū tiaki tamariki, ā, he rerekē ngā kaupapa whakaaro o ngā ratonga pērā i a Montessori me Steiner.

ratonga akoranga kōhungahunga, kei reira ētahi wāhi he iti rawa te whakarato paetata i ngā momo ratonga e uaratia ana e ngā mātua me ngā whānau, tae atu ki ngā ara reo mō te Māori me Te Moananui-a-Kiwa. Kei reira anō ētahi ngā māharahara mō te nui rawa o ētahi momo ratonga.

Hei whakatutuki i te matakitenga o tēnei mahere mahi, e hiahiatia ana ngā huringa ki te kaupapahere me ngā tikanga mahi puta noa i te pūnaha akoranga kōhungahunga hei hiki i te kounga, te whakapai ake i te ōritetanga me te āhei ki ngā kōwhiringa.

## Ka aha ināianei?

Ka āta whakaurua haerehia mai te whakatinanatanga o ngā mahi o tēnei mahere i roto i te 10 tau e whai ake. E herea ana te whakatinanatanga e ngā whakaaetanga a te Rūnanga o te Kāwanatanga ki ngā mahi takitahi me ngā tukanga Tahua ā muri ake.

He maha ngā mahi me whakarerekē ki tētahi o ngā āhuatanga kotahi, neke atu rānei o te pou tarāwaho ture e whakahaere ana i ngā ratonga akoranga kōhungahunga. Me mārama ko ngā mahi kei roto i tēnei mahere mahi me whakarerekē e te ture he tauākī koronga ērā, e tārewa ana e ai ki ngā whakawhitiwhiti kōrero tūmatanui i roto i te tukanga whakarerekē ture.

## Ngā whāinga o tēnei mahere

I takea mai te mahere i ngā whāinga e rima, ā, kei roto ko ngā mahi 25 ka mahi tahi kia eke ai ngā huringa pūnahanaha. E ū ana ngā whāinga o tēnei mahere ki ngā whāinga 10 tau a te Kāwanatanga mō te pūnaha mātauranga whānui ake.

### Whāinga 1. Ka whai wheako ngā tamariki me ngā whānau ki ngā taiao e hāpai ana i tō rātau orange me te tautoko i tō rātau tuakiri, reo me te ahurea

#### 1.1 Te whakapai ake i te ōwehenga o ngā pakeke ki ngā tamariki i raro i te 3 tau i roto i ngā ratonga akoranga kōhungahunga e ārahina ana e ngā kaiako

Mā ngā ōwehenga pakeke:tamaiti teitei e taea ai te whakawhitiwhiti a ngā pakeke me ngā pēpi, kōhungahunga hoki. Kāore i te pai ngā ōwehenga pakeke:tamaiti iti rawa mō ngā tamariki i raro i te 3 tau ki te taha o ngā tūtohutanga mai i ngā whakaaturanga me ngā ōwehenga kua whakaritea i ngā whenua OECD ōrite.

Ka whakaurua haerehia mai ngā ōwehenga pakeke:tamaiti hou e whai ake mō ngā ratonga akoranga kōhungahunga i roto i te roanga o tēnei mahere. Ka noho wawata te ōwehenga o te 1:3 mō ngā tamariki i raro i te 2 tau i roto i te wā roa.

Taipakeke	Kei raro i te 2 tau	2 tau
Ōwehenga onāiane	1:5	1:10
Ngā ōwehenga hou	1:4	1:5

I te mea kei reira ngā whirinakitanga i waenga i ngā ōwehenga pakeke:tamaiti me te whakapai ake i te rahinga o ngā kaiako whai tohu i ētahi momo ratonga (mahi 3.1), me te kukume mai me te pupuri i ngā kaiako whai tohu (ngā mahi 3.3 me te 3.4), ka whāia tēnei ara raupapa:

- » I roto i te pae tata, ko ngā ratonga pokapū ā-kaiako<sup>2</sup> me ngā ōwehenga pakeke:tamaiti o te 1:4 mō ngā tamariki i raro i te 2 tau, te 1:5 mō ngā tamariki 2 tau hoki/rānei ka nui ake te whiwhi pūtea.
- » I te roto i te pae tata me te pae tawhiti, ka noho tikanga ngā ōwehenga pakeke:tamaiti o te 1:4 mō ngā tamariki i raro i te 2 tau me te 1:5 mō ngā tamariki 2 tau mō ngā ratonga pokapū ā-kaiako. Ina mana ana, ka whakaata ngā rahinga pūtea i te pikitanga o ngā utu ki ngā ratonga o ēnei ōwehenga kua whakaritea.

Ka tautoko te Tāhuhu i ngā ratonga tautoko mā ngā tohutohu me pēhea te whakatinana i ngā ōwehenga hou me ngā wehenga tau.

## 1.2 Me here i ngā kaiako kia noho rite i waenga i ngā rōpū tamariki mā ngā āhuatanga e tautoko ana i te manaaki haumaruru me te ōrite, ngā huarahi ako reo me ngā whakawhitinga pai mō ngā tamariki me ngā whānau

E ai ki ngā rangahau me whai hononga haumaruru, pūmau, pāhekoheko hoki te tamaiti ki ngā pakeke.

Ko te koronga o te Tāhuhu kia arotakehia ngā paeuru tuku raihana hei here i ngā kaiwhakarato ratonga ki te waihanga i ngā kaupapahere he pēhea te whakariterite i ngā kawenga o ngā kaiako mō ngā tamariki kia ū ai ki ngā hiahia i roto i tētahi horopaki rōpū.<sup>3</sup> Ka whakaatu ēnei kaupapahere i te āhua o te tautoko a ngā pakeke e tuarhia ana i roto i ngā ratonga i ngā manaakitanga haumaruru me te ōrite me ngā whakawhitinga pai mō ngā tamariki.

## 1.3 Te waihanga tohutohu mō te rahi ā-rōpū, te hoahoa o te pokapū me ngā āhuatanga ā-taiao whānui ake, ā, me pēhea te whakapai ake i ngā paerewa kounga i ēnei wāhi

E kitea ana te hono o ngā rōpū iti ki te kounga pai ake o ngā wheako akoranga kōhungahunga, otirā mō ngā tamariki nohinohi me ērā e noho ana i ngā āhuatanga mōrea nui. Waihoki, ko ngā wāhi mahana, wāteatea me te tuku i ngā tamariki kia whai wāhi atu ki te ao tūroa he mea hira mō te oranga me te akoranga o ngā tamariki.

E marohitia ana kia whakawhanake i ngā tohutohu mō ngā nohonga i waenga i te rahinga rōpū me ngā āhuatanga taiao whānui, ā, me pēhea te whakapai ake i ngā paerewa kounga i ēnei wāhi. Ka kōrerorero tahi te Tāhuhu ki te rāngai mēnā ka tūtohua he huringa ā-ture, tae atu ki ngā pānga ā-whakahaere, ā-pūtea.

## 1.4 Te tautoko i ngā mātua me ngā whānau ki te whiriwhiri i ā rātau ara akoranga mātauranga me te reo mā te āhei atu ki ngā mōhiohia pai ake

Ka kōrero te Tāhuhu ki ngā mātua, ngā whānau me ngā hāpori ki te tautuhi i ngā whāruarua o ngā mōhiohia me ngā tikanga mō te whakaatu mōhiohia mā ngā āhuatanga e tino wātea ake, ā-ahurea hoki. Ka arotahi tēnei mahi ki te whakarite kei te whiwhi ngā mātua i ngā mōhiohia me ngā tautoko e hiahiatia ana hei kōwhiri i tētahi ratonga akoranga kōhungahunga mō tā rātau tamaiti me te nekeneke i roto i te pūnaha.

Ka āwhina anō ngā mōhiohia mai i ngā kōtaha kōtuinga (mahi 5.1) me te whakarātonga o ngā ratonga pāpori tauawhi (mahi 2.1 me te 2.2) i ngā mātua ki te neke haere i ngā ara mātauranga. Ko ngā mātua e hiahia kē i

<sup>2</sup> E hāngai ana tēnei mahi ki ngā ratonga pokapū anake, ā, kāore e hāngai ana ki ngā ratonga ā-hōhipera, ā-kāinga rānei.

<sup>3</sup> E āhukahukatia ana he rerekē te mahi a ngā ratonga i rō hōhipera ki ētahi atu ratonga akoranga kōhungahunga, ā, me whai whakaaro ki tēnei rerekētanga me te whakarātonga tauwhāiti i roto i te arotakenga o ngā paeuru tuku raihana.

tētahi kōwhiringa ā-kanohi, ā-waea rānei ka taea tonu te whakapā atu ki ngā tari ā-rohe a te Tāhuhu mō ngā mōhiohio.

## **Whāinga 2. Ka taea e ngā tamariki katoa te whai wāhi atu ki ngā akoranga kōhungahunga me te whai i ngā tautoko e hiahiatia ana e rātau ki te ako, ā, kia momoho**

E tautokona ana tēnei mahere e te Mahere Mahi Tautoko Akoranga 2019-2025 (LSAP). E whakatakoto ana te LSAP i ngā mahi e puta ai ngā ara pūnahanaha ake hei tautuhi i ngā matea tautoko ako o ngā tamariki, tae atu ki te tiro tiro i te taha o Te Manatū Hauora ngā aromatawai hauora whānui mō ngā tamariki 3 tau. Kei roto anō ko ngā mahi hei whakapakari i te wawaotanga tōmua hei whakaiti i ngā rārangi tatari, ā, ka taea e ngā whānau ngā tautoko i roto i te wā tika.

Mā te [Rautaki Oranga Tamaiti me te Taiohi](#) ka taea tētahi urupare puta noa i ngā tari hei āwhina ki te whakatutuki i te ōritetanga mai i te tīmatanga, ā, ka mahi tahi te Tāhuhu me te rāngai me ētahi atu tari ki te whakarato i tēnei rautaki.

### **2.1 Te arotake i ngā tuku pūtea ōrite me te hāngai hei whakarite kia pai rawa te tautoko i ngā tamariki kia whai hua mai i ngā wheako akoranga kōhungahunga kounga tiketike**

E tuku pūtea tōkeke te Kāwanatanga i tēnei wā me ngā pūtea matawhāiti mō ngā whakatikitanga hei tautoko i ngā tamariki kia haere ki ngā ratonga kounga tiketike me te whai tautoko akoranga ina e hiahiatia ana. Ka arotake te Tāhuhu i ēnei hei whakarite ka tautoko pai rawa ēnei i ngā tamariki kia whai hua mai i te urunga ki ngā wheako akoranga kōhungahunga kounga tiketike me te hāngai ki ngā mahi hāngai i roto i te LSAP.

### **2.2 Te waihanga i ngā tohutohu ki te takawaenga i ngā ratonga hauora me te pāpori tauawhi hei tautoko i ngā tamariki me ō rātau whānau me te whakarite e marama ana kei a wai te kawenga mō te whakariterite i ngā tautoko akoranga kei ia ratonga akoranga kōhungahunga**

Ka tautoko te Tāhuhu i ngā kaupapahere me ngā kaupapa tautoko mai i te [Rautaki Oranga Tamaiti me te Taiohi](#) me te tautoko i ngā urupare puta noa i ngā tari e whakarite ana i ngā whāruarua o ngā tautoko hauora, pāpori me ngā raruraru e pā ana ki te akoranga tōmua o ngā tamariki.

Kei te takawaenga kē ētahi ratonga akoranga kōhungahunga i ngā tautoko tauawhi mai i ētahi atu tūmomo ratonga, hei tauira, ngā toronga a ngā nēhi hauora tūmatanui me ngā kaiwhakatika reo kōrero. Ka whakatenatena te Tāhuhu i ngā tauira tuari o ngā tikanga pai puta noa i ngā ratonga, tari me ngā hāpori, tae atu ki te taumata ā-rohe. I tua atu i tēnei, ka mahi te Tāhuhu i te taha o te rāngai ki te whakarite ka tohua ngā tāngata kei a rātau ngā kawenga hira mō te whakariterite i ngā tautoko akoranga i roto i ia ratonga akoranga kōhungahunga.

Ka whakamahia e te Tāhuhu ētahi āhuatanga hei whakawhānui i ngā mōhio me ngā pūkenga o te ohu mahi i roto i te tautuhinga me te urupare tōmua ki ngā hiahia tautoko akoranga hei wāhanga o te whakatinana i te [LSAP](#).

## **Whāinga 3. He tino matatau, he kanorau, he mōhio hoki ngā kaimahi whakaako me ngā kaiako kaiārahi ki ngā tikanga, ka mutu e uaratia ana rātau**

### **3.1 He whakapoapoa mō te 100 ōrau, ā, kia whakaritea mō te 80 ōrau o ngā kaiako whai tohu i roto i ngā pokapū whai kaiako, e eke ai te 100 ōrau**

He tino tautoko ngā tohu kaiako i ngā tikanga kounga, hei tauira, kia āhei ai ngā whakawhitiwhiti kounga tiketike me ngā tamariki.



Ka whakapiki te Kāwanatanga i te ōwehenga o ngā kaiako whai tohu i roto i ngā ratonga akoranga kōhungahunga ā-kaiako, ā-pokapū hoki.<sup>4</sup> Ka āta whakaurua mai tēnei huringa, ā, ka tīmata atu i ngā whakapoapoa tuku pūtea mō te 100 ōrau o te whai tohu.

Ka mahi te Tāhuhu i te taha o te rāngai kia mārama ai ki te putunga me te hiahia ki ngā kaiako, ā, me pēhea te whakatenatena i te whai i te mātauranga kaiako tīmata (ITE) hei whakapiki ake i te rahinga o ngā kaiako whai tohu. Ko ngā upane hei tautoko i tēnei ko ēnei:

- » I roto i te wā poto, ko te whakauru mai i ngā rahinga pūtea nui ake mā ngā ratonga akoranga kōhungahunga ā-kaiako, ā-pokapū hoki kia 100 ōrau ngā kaiako whai tohu.
- » I roto i te wā poto, ko te huringa ā-whakaritenga kia 80 ōrau ngā kaimahi whakaako i roto i ngā ratonga ā-kaiako me kaiako whai tohu, ā, i ngā wāhi e whakarōpūtia ana ngā tamariki i ngā wāhi wehe kē, kia kotahi i te iti rawa te kaiako whai tohu ki ia rōpū.

I te whakatinanatanga haere o ngā whakapoapoa pūtea me ngā huringa ā-whakaritenga, ka tino arotahi ki ngā pānga ki ngā ara reo, tae atu ki te kaha o ngā ratonga ki te pupuri i ngā kaikōrero matatau i te reo i roto i te ohu mahi whānui. Ka uru ki te rautaki ohu mahi mātauranga (EWS) tētahi arotahi ki te whakatipu i te kanorau o ngā ahurea me ngā ira tangata me te whakaiti i ngā tauārai ki te hunga hauā e whakauru ana ki te ohu mahi whakaako.

### **3.2 Te whakapiki i te taumata o ngā tohu kaiwhakaako ā-kāinga**

Mai i te 2019, ko ngā whakatikatanga ki ngā rahinga pūtea mō ngā ratonga akoranga kōhungahunga ā-kāinga ka tukuna ake ki ngā rahinga pūtea whai kounga. Ko ngā kaiwhakaako katoa i roto i ngā ratonga rahinga whai kounga me mātua whai tohu ECE Taumata 3, ngā whiwhinga rānei ki te tohu ECE Taumata 4.

Ā tōna wā, me whiwhi, kei te whai rānei ngā kaiwhakaako ā-kāinga katoa i tētahi tohu ECE Taumata 4, Te Ara Tuarua, me whai tohu ECE teitei ake rānei, tohu kōhanga reo teitei ake rānei.

Ko ngā kaiwhakaako whai tohu ECE Taumata 3 ka whakaaetia he ōrite ki te tohu ECE Taumata 4.

### **3.3 Ka waihanga i tētahi rautaki puna kaiako o te akoranga kōhungahunga e hāngai ana ki te rautaki ohu mahi mātauranga whānui**

I roto i te rautaki ohu mahi, kei reira ngā tautoko mā ngā kaiako whai tohu kia hoki ki roto i ngā akoranga kōhungahunga, te whakawhānui ake i te puna o ngā kaiako whai tohu o te hau kāinga, me te whakatītina i ngā kaiako akoranga kōhungahunga whai tohu o Aotearoa kei tāwāhi kia hoki mai ki te kāinga.

I roto i te pae tata ki te pae tawhiti, ka tautoko ētahi tūmomo karahipi, takuhe hoki i te ohu mahi akoranga kōhungahunga kore tohu kia whai i ngā tohu ITE me ngā tautoko hāngai hei kukume mai i ngā whakaurunga a te Māori, Te Moananui-a-Kiwa hoki.

Ka āwhina ngā utu me ngā āhuratanga pai ake (mahi 3.4) me ngā ōwehenga pakeke:tamaiti pai ake (1:1) ki te kukume mai me te pupuri i ngā kaiako.

### **3.4 Te whakatinana i tētahi tikanga ka whakapiki i ngā taumata me te ōritetanga o ngā utu ā-tau a ngā kaiako me ngā here puta noa i te rāngai akoranga kōhungahunga**

Ka hangaia e te Tāhuhu tētahi huarahi e hāpai ana i ngā utu ā-tau a ngā kaiako me ngā āhuratanga ōrite ake, pai ake hoki i te rāngai akoranga kōhungahunga. Ko te tikanga ka hiahiatia ngā rerekētanga ki te pūnaha tuku pūtea ki te akoranga kōhungahunga, ā, ka āta whakatinanahia haeretia hei whakarite he toitū tēnei ara.

---

<sup>4</sup> E hāngai ana tēnei mahi ki ngā ratonga pokapū anake, ā, kua ki ngā ratonga ā-hōhipera, ā-kāinga rānei.

### **3.5 Te whakapai ake i te mātauranga kaiako tīmata (ITE) hei whakarite kei te tino whai tohu ngā kaiako ki te whakatinana i te marautanga i te taha o ētahi atu ngaio**

Kua arotakehia e Matatū Aotearoa te whakaratonga o te ITE me te waihanga i ngā whakaritenga hou e whakaata ana i te neke i roto i ana tūmanako. Ka āwhina ēnei huringa ki te whakarite he ara whakangungu ngāwari kei reira, ā, e takatū ana ngā paetahi ITE ki te whakaako me te whai tonu i te ara ki te whiwhi tiwhikete tūturu. E herea anō ngā kaiwhakarato ITE ki te waihanga i ngā kaupapa ITE mā ngā pātuitanga tūturu me ō rātau hapori, me ngā iwi, kura hoki.

Ka mahi tahi te Tāhuhu, a ERO me Matatū Aotearoa ki te waihanga i ngā whakaritenga matua hei whakatutuki i tēnei mahi, me te arotake i te anga whakamua i te roanga atu o te mahere.

### **3.6 Te waihanga i tētahi ara pūmau, whakaraupapa hoki mō te whakawhanaketanga me te akoranga ngaio (PLD)**

Ka āwhina te PLD ki te pupuri me te whakakaha i ngā tikanga e tautoko ana i te ako me te oranga o ngā tamariki. Ka whakaurua mai e te Tāhuhu tētahi kaupapa PLD ā-motu raupapa, pipiri hoki hei tautoko i te hoahoa me te whakatinanatanga o te marautanga paetata i roto i te pou tarāwaho o *Te Whāriki*. Ka uru ki ngā PLD katoa ko te arotahi ki te tuakiri, reo me te ahurea me te whakaurunga o ngā tamariki hauā, whai matea ako tāpiri rānei.

Ka hangaia anō tētahi kaupapa PLD ā-motu hei whakatipu i ngā pūmanawa kaiārahi o ngā kaiako me ngā kaiwhakaako i roto i ngā tūranga kaiārahi.

### **3.7 Te waihanga i ngā pokapū auaha me te rangahau mō ngā ratonga akoranga kōhungahunga**

Ka tuku kirimana te Tāhuhu mō te whanaketanga o ngā pokapū auaha me te rangahau e āhei atu ai ngā kaiako akoranga kōhungahunga ki ngā pūkenga, pātui me ngā rauemi. Ka taea tuihonotia ēnei pokapū hei whakangāwari i ngā tauārai ki te whai wāhitanga, ā, ka hoahoatia hei whakatairanga i te mahi ngātahi puta noa i te ratonga me te rāngai.

Ko tērā e tūmanakohia ana ka whāngai te kaiako, te hapori, te ratonga akoranga kōhungahunga me ngā kaupapa matua a te kāwanatanga i ngā pātai rangahau ngā auahatanga rānei. Ka tautuhi te Tāhuhu me te tātari i ngā kōwhiringa mō te whanaketanga o ēnei pokapū i muri i te whakataunga o Te Arotake i Ngā Kura mō Āpōpō me ētahi atu whakahoutanga mātauranga onāiane.

### **3.8 Te tautoko i ngā ratonga akoranga kōhungahunga kia whai wāhi atu hei pātui tōkeke i roto i te mahi ngātahi puta noa i ngā ratonga me ngā rāngai**

He mea nui te mahi tahi mō te tuari i ngā tikanga pai, ā, ka tautoko te mahi ngātahi me ngā kura i ngā whakawhitinga pai mō ngā tamariki. Ka tautoko tonu te Tāhuhu i ngā mahi tahi i waenga rāngai mā ngā kaupapa pērā i Ngā Kāhui Ako, me te tiroiro i ētahi atu kōwhiringa hei tuari akoranga i waenga ratonga me te waihanga i ngā kōtuinga mahi tahi.

Ko ētahi atu mahi i roto i tēnei mahere he tautoko i te mahi tahi ko te waihanga i ngā pokapū auaha me te rangahau (mahi 3.7) me te tuku i ngā tautoko poari whakahaere ki ngā rōpū ratonga iti (mahi 5.4).

### **3.9 Te tautoko i te ohu mahi ki te whakauru mai i te reo Māori ki roto i ngā ratonga akoranga kōhungahunga katoa**

*E whakatakoto ana Te Whāriki* i ngā tūmanako ka pāhekoheko i ngā ratonga akoranga kōhungahunga reo Māori me ngā tikanga Māori i roto i tā rātau marautanga kia angitu ai i roto i te mātauranga hei Māori.

Hei tautoko me te whakakaha i ngā ratonga ara reo Māori, me te whakawhānui i te whakamahinga o te reo Māori puta noa i ngā ratonga akoranga kōhungahunga katoa, ka arotakehia e te Tāhuhu te whakaratonga o te PLD (mahi 3.6) hei whakarite ka tino arotahi ki te pātuitanga me te mana whenua i roto i ngā kaupapa PLD paetata. Ka tautokona ana te PLD e te whakatinanatanga o *Te Ahu o te Reo Māori* – he kaupapa PLD e whai ana ki te whakatipu me te whakakaha i te whakamahinga o te reo Māori i roto i ngā wāhi mātauranga.

Ko ngā whakaritenga hou i hangaia e Matatū Aotearoa ka āwhina ki te whakauru mai i te reo Māori ki ngā ratonga akoranga kōhungahunga katoa. Hei tauira, ka aromatawaitia ngā ākonga kei ngā kaupapa ITE reo Pākehā mō tō rātau mōhio ki te reo Māori.

## **Whāinga 4. Ka whakawhanake ngā tamariki i ngā pūmanawa e uaratia ana e ō rātau whānau me te hapori, ā, ka tautokona rātau kia noho hei ākonga mōhio, māia hoki**

### **4.1 Kāhitiia te pou tarāwaho marautanga, Te Whāriki, hei tautoko i te whakamahi i ngā mātāpono, ngā aho, ngā ūnga me ngā putanga ina waihanga ana i ngā marautanga paetata**

*I ahu mai Te Whāriki* mai i ngā mātāpono, ngā aho, ngā ūnga me ngā hua akoranga. He rerekē te mahi a ia wāhanga o *Te Whāriki*<sup>5</sup> i te whakatinanatanga whitake o te marautanga. I roto i ngā ratonga akoranga kōhungahunga tino kounga, ka whai wāhi ngā kaiako me ngā kaiwhakaako ki te pou tarāwaho whānui ina whakatinana ana i te marautanga paetata e whakaata ana i te akoranga e uaratia ana e ā rātau tamariki, whānau me te hapori.

Kei roto ēnei i te pou tarāwaho ture:

- » ngā mātāpono – whakamana, kotahitanga, whānau tangata, ngā hononga me
- » ngā aho – mana atua, mana whenua, mana tangata, mana reo, mana ao tūroa.

I te tau 2020, ko te whakarite ka kāhitiia anō ngā ūnga me ngā hua akoranga o *Te Whāriki*<sup>6</sup> ki roto i tēnei pou tarāwaho marautanga. Ka āwhina te whakaurunga o ngā wāhanga katoa e whā o *Te Whāriki* ki te pou tarāwaho ture kia mārama ai ki te tūranga me tana mahi mō te tautoko i te hoahoa i te marautanga.

### **4.2 Te waihanga ngātahi i ngā tūmomo utauta tika, whaikiko, tōtika ā-ahurea me te reo hei waihanga, e ū ana ki ngā tikanga me te reo hei tautoko i ngā aromatawai whakawhanake me ngā tikanga whakaako**

Ka anga whakamua ngā tamariki i roto i ngā āhuatanga ōrite, rerekē, e whakawhanake ana i ō rātau ake poutama akoranga. Kei te nui haere kē atu tō rātau kaha ki te tātari i tō rātau ake anga whakamua me te whakatakoto i ngā ūnga mō rātau anō. Ka aro atu ngā kaiako me ngā kaiwhakaako ki te anga whakamua hei tautuhi i ngā āhuatanga hei whakahōhōnu, whakakaha rānei i te akoranga a ngā tamariki. Ka taea anō e ngā kaiako te aroturuki i ā rātau ake tikanga me te whai kia pai ake.

I roto i te wā pae tata, ka mahi tahi te Tāhuhu me ngā kairangahau akoranga kōhungahunga me ngā tohunga ki te waihanga i ngā utauta me ngā tikanga aromatawai whakawhanake i roto i te pou tarāwaho o *Te Whāriki*, e toro ana i ngā whakaaturanga rangahau ā-motu, ā-ao hoki. Hei whakarite i ngā tikanga whitake, tōtika, e hāngai ana ki te ahurea me te reo, ka whai pūkenga ēnei kairangahau me ngā tohunga i roto i te aromatawai whakawhanake, me ngā horopaki kaupapa Māori, Te Moananui-a-Kiwa hoki.

### **4.3 Mā ngā ratonga tautoko hei whakahaere i ngā arotakenga ā-roto pakari hei whakakaha ake i te hakinanatanga o Te Whāriki me te whakarite kia pai haere tonu ai**

Kua whakahoutia e ERO ana tūtohu kounga mō ngā ratonga akoranga kōhungahunga i roto i tētahi kaupapa whānui o te arotake me te waihanga i te tikanga mahi. He mea hira ngā tūtohu ki te arotakenga ā-waho, ā-roto hoki e arotahi ana ki te whakapiki kounga. He tuku i tētahi utauta mā ngā ratonga hei arotake i ā rātau ake mahinga me te waihanga i tētahi mahere whakapiki kounga e tautoko ana i ngā mahi whakapai ake haere tonu.

<sup>5</sup> *Te Whāriki: He whāriki mātauranga mō ngā mokopuna o Aotearoa.*

<sup>6</sup> E kōrero ana mō *Te Whāriki: He whāriki mātauranga mō ngā mokopuna o Aotearoa.*

## **Whāinga 5. Kei roto ngā ratonga akoranga kōhungahunga i tētahi pūnaha taiao mātauranga i whakaritea, he pipiri hoki kei te tautokona, he noho haepapa, he toitū hoki**

### **5.1 Te whakauru i tētahi ara kōtuinga ka whakahaeretia hei whakarite i te tino kounga, te kanorau me te toitūtanga o te whakaratonga akoranga kōhungahunga**

Ko tā te Tāhuhu he tuku raihana, he aroturuki, he tuku pūtea me te tautoko i ngā ratonga akoranga kōhungahunga engari kāore e āta whakauru atu ki ngā whakamahere kōtuinga. Ka āwhina te tino whakahaere i te kōtuinga ki te whakarite kei te āhei atu ngā tamariki katoa ki ngā wāhi akoranga kōhungahunga whai kounga me te ārai i ngā raruraru o te nui rawa o ngā ratonga.

Ka whai te Tāhuhu i tētahi ara raupapa hei waihanga i tētahi mahinga kōtuinga. Ka hangaia ngā kōrero kōtuinga hei āwhina i ngā kaiwhakarato ki te tuku whakatau mō te whakatuwhera i ngā ratonga hou. Ka tiroiro anō te Tāhuhu i ngā huringa whakaritenga, ture hoki kia taea ai te kōtuinga te tino whakahaere e āhei atu ai ngā mātua ki tētahi ratonga e ū ana ki ō rātau hiahia.

Ka whakaurua mai e te Tāhuhu tētahi ara tuku raihana upane rua:

- » Ka whakarite te Upane 1 kia whakaatu ngā kaiwhakarato ratonga i tō rātau hiahia ki te whakatū ratonga, te whakawhānui rānei (i mua i te whiwhi whenua, whare rānei). Kia whakaaetia, me ū ngā ratonga ki tētahi hiahia onāiane, o āpōpō rānei, me whakaatu ngā kaiwhakarato he pai te kounga o ā rātau ratonga onāiane.
- » Ko te Upane 2 ko te tono raihana whānui hei whakarite ka ū te ratonga ki ngā paerewa kua whakaritea me ētahi atu whakaritenga mō te tuku raihana.

### **5.2 Te tautuhi i ngā kōwhiringa hei whakarite i te rato o ngā ratonga akoranga kōhungahunga i roto i ngā hapori kāore i tino whiwhi i ēnei**

Hei tāpiritanga ki te mahinga whakahaerenga kōtuinga, ka tūhura te Tāhuhu i ngā kōwhiringa hei whakarite ka āhei atu ngā tamariki o ngā hapori pōhara ki ngā ratonga akoranga kōhungahunga whai kounga e tautoko ana i tō rātau tuakiri, reo me te ahurea. Ka tiroirohia te whakatūtanga o ngā ratonga a te kāwanatanga, e ai ki tērā e marohitia ana i roto i te mahere hukihuki, i roto i tēnei horopaki mō ngā hapori e pēhia ana ngā tamariki ina toro ana i ngā ratonga e urupare ana ki ō rātau hiahia. Ko ētahi atu kōwhiringa ko ngā whakapoapoa tuku pūtea, te toro atu ki ngā kaiwhakarato (tino kounga) e manakohia ana, me te tono i ngā whakapuakanga hiahia.

### **5.3 Te wehe mai i tētahi wāhi mō ngā ratonga akoranga kōhungahunga i te taha o ngā wāhi kura tuatahi, ina taea ana**

Ko te whakaratonga o ngā ratonga akoranga kōhungahunga i ngā whenua kura ka whakarei ake i ngā hononga i waenga i ngā tamariki kōhungahunga me ō rātau whānau, hapori, kura hoki. Ina taea, ka whakaritea mai e te Tāhuhu he whenua i ngā kura hei whakamahi mō te tuku i ngā ratonga akoranga kōhungahunga. Ka tukuna e te Tāhuhu te whenua me te tuku nama mō te rīhi. Nō ngā ratonga akoranga kōhungahunga te whare me te kawenga mō ngā āhuatanga katoa o te whare, tae atu ki te rīanga me te tautiaki. He whai wāhitanga kei roto i te tirohanga pae tawhiti o te ture e āhei ai ngā kura ki te whakahaere ratonga akoranga kōhungahunga.

### **5.4 Te whakakaha ake i ngā tautoko mā ngā poari, rōpū whakahaere hoki mō te reo o Te Moananui-a-Kiwa me ngā ratonga akoranga kōhungahunga**

He mea taketake ngā pūmanawa poari whakahaere me te whakahaerenga mō te tuku ratonga akoranga kōhungahunga toitū, tino kounga hoki. Kāore pea ngā ratonga ā-hapori, i ara ake hei whakaata i tētahi hapori, reo me ngā tūmanako ahurea, i te whai wāhi atu ki ngā pūkenga poari whakahaere me te whakahaerenga e hiahia ana hei whakahaere ratonga. Ki te kore e tukuna ngā tautoko tauwhāiti, ko te mataku kāore pea e mau roa ngā ratonga ā-hapori, te tango i tētahi kōwhiringa e uariatia ana e ngā mātua.

Kia pai ake ai te tautoko i ngā ratonga ā-hapori, ka tautuhi te Tāhuhu me te whakahou, te hāpai hoki i ngā mōhiotia onāiane, ngā whakangungu me ngā tohutohu poari whakahaere, whakahaerenga hoki e wātea ana ki ngā whakahaere pērā i ngā pokapū akoranga kōhungahunga.

Ka tūhura anō te Tāhuhu i ngā kōwhiringa mō ngā tauira poari whakahaere hou me te whakahaerenga hou i roto i te horopaki o te whakamahere i te kōtuinga. Ko tētahi wāhanga o tēnei ko te tātari i ngā kōwhiringa hei whakatenatena i te whakatōpūtanga, me te nui haere ake o te tuari i ngā tautoko me ngā mahinga kaiārahi me te whakahaerenga (hei tauira, ngā puna kairīwhi, whakahaere tari). Ka tino aro atu ki te tautoko i te toitūtanga o ngā ratonga akoranga kōhungahunga o Te Moananui-a-Kiwa e tautoko ana i ngā wawata reo, ahurea hoki o ngā mātua me ngā hapori.

### **5.5 Te whakauru mai i tētahi kaupapa ōrite me te pakari mō te aroturuki me te tuku raihana**

Ka tuku raihana te Tāhuhu ki ngā ratonga akoranga kōhungahunga me te whai mana ā-ture ki te whakaū i ngā whakaritenga me te kōkiri i ngā wawaotanga i whakaritea, tae atu ki ngā tūhuratanga amuamu me te raruraru. Kei roto te Tāhuhu me ERO i te aroturuki i ngā ratonga akoranga kōhungahunga.

Kei te whakatinanahia e ERO tētahi ara ā-mōrea e tautuhi ana i ngā ratonga me tino aro atu. Ka hangaia e te Tāhuhu tētahi kaupapa o ngā toronga hāngai mō ngā ratonga iti te kounga hei tautuhi i ngā tautoko e tino hiahiatia me te takawaenga i ngā rongoā.

E marohitia ana ka arotakehia ngā ture hei whakakaha i te kaha o te Tāhuhu kia whai whakaaro ai ki te hītori raihana o te ratonga akoranga kōhungahunga ina whiriwhiri ana mēnā ka tuku i tētahi raihana whakamātautau, me te whakakore i te raihana o tētahi ratonga e rite tonu ana te tuku raihana takitaro. E marohitia ana anō, ina whakamahia tētahi urupare ā-ture, me whakamōhio atu ngā ratonga i ngā whānau mō ngā pūtake aukatinga me ngā upane ka whāia hei whakarite i ngā raruraru.

### **5.6 Te whakapai ake i te pūrangiaho tuku pūtea mā ngā mātua, ngā kaiako me te kāwanatanga**

Me ngā ture tuku pūtea me ngā here hei whakaputa i ngā mōhiohio mō te rahinga o te pūtea āwhina a te kāwanatanga ka whiwhi i ngā tamariki. Ka āwhina ēnei mōhiohio ki te whakapai ake i te haepapa mō te tuku pūtea kia noho mōhio ai ngā mātua mō te āhua o te tautoko a te kāwanatanga i te whai wāhi atu o ngā tamariki.

Ka whakaritea anō ngā kaiwhakarato ratonga ki te tuku pūrongo ā-tau mō ngā moni whiwhi me ngā whakapaunga i raro i te raihana ki ngā kāwai tauwhāiti. Ka tautoko tēnei kia nui ake te pūrangiaho o ngā pūtake utu o te akoranga kōhungahunga. Ka āwhina anō i te Tāhuhu ki te tautuhi i ngā ratonga noho mōrea.

### **5.7 Te waihanga ngātahi i tētahi tauira tuku pūtea me Playcentre Aotearoa New Zealand**

He tauira ratonga akoranga kōhungahunga ahurei te Rōpū Tākaro nō Aotearoa e whakapono ana ko ngā mātua ngā kaiwhakaako tuatahi, pai rawa hoki i ā rātau tamariki. Kei te hanga ngātahi te Tāhuhu i tētahi tauira tuku pūtea i tēnei me Playcentre Aotearoa New Zealand me te whiriwhiri i ngā whakaritenga tohu kia hāngai ai ki te tauira whakahaere e hiahiatia ana e te whakahaere.

## **Ka pēhea tā mātau aroturuki me te arotake i te anga whakamua?**

Ka mahi tahi te Tāhuhu me ERO ki te aroturuki me te tātari i te pānga o ngā mahi i roto i tēnei mahere. Hei tīmatanga ka whakatakotohia e mātau tētahi arotau me te whakarite kua tau ngā inenga paerewa hei ine i ngā huringa.

Ka whiriwhiria e te Tāhuhu me ERO te haumi ki ngā whakaritenga kei reira ngā whāruarua ine. Ka hangaia ngā tohu nui i te taha o te arotau wawaonga me te mahere arotakenga.

# He tirohanga poto ki te mahere mahi

Whāinga 1	Whāinga 2	Whāinga 3	Whāinga 4	Whāinga 5
<b>Ngā whāinga 10-tau mō te mātauranga</b>				
<b>Kei te iho ngā ākonga me ō rātau whānau</b>	<b>Kāore he tauārai i roto i te mātauranga</b>	<b>Ngā whakaakoranga me te kaiārahi kounga</b>	<b>Ngā akoranga me te mahi anamata</b>	<b>He mātauranga tūmatanui taumata tiketike e manaaki ana i te katoa</b>
Kei te iho ngā ākonga me ō rātau whānau o te mātauranga	Ka taea ngā whai wāhitanga me ngā putanga rawe mō ia ākonga	He tino whitake ngā whakaakoranga me te kaiārahi kounga mō ngā ākonga me ō rātau whānau	Ngā akoranga e hāngai ana ki ngā ao o ngā tāngata o Aotearoa i tēnei rā, ā, puta noa i ō rātau rā	E pono ana, e toitū ana te mātauranga o Aotearoa
<b>Nga whāinga mahere mahi akoranga kōhungahunga</b>				
<b>Ka whai wheako ngā tamariki me ngā whānau ki ngā taiao e hāpai ana i tō rātau orange me te tautoko i tō rātau tuakiri, reo me te ahurea.</b>	<b>Ka taea e ngā tamariki katoa te whai wāhi atu ki ngā akoranga kōhungahunga kounga me te whai i ngā tautoko e hiahia ana e rātau ki te ako, ā, kia momoho.</b>	<b>He tino matatau, he kanorau, he mōhio hoki ngā kaimahi whakaako me ngā kaiako kaiārahi ki ngā tikanga, ka mutu, e uaratia ana rātau.</b>	<b>Ka whakawhanake ngā tamariki i ngā pūmanawa e uaratia ana e ō rātau whānau me te hapori, ā, ka tautokona rātau kia noho hei ākonga mōhio, māia hoki.</b>	<b>Kei roto ngā ratonga akoranga kōhungahunga i tētahi pūnaha taiao mātauranga i whakaritea, he pipiri hoki kei te tautokona, he noho haepapa, he toitū hoki.</b>
<ul style="list-style-type: none"> <li>» Te whakapai ake i te ōwehenga o ngā pakeke ki ngā tamariki i raro i te 3 tau i roto i ngā ratonga akoranga kōhungahunga e ārahina ana e ngā kaiako. (1.1)</li> <li>» Me here i ngā kaiako kia noho rite i waenga i ngā rōpū tamariki mā ngā āhuratanga e tautoko ana i te manaaki haumarua me te ōrite, ngā huarahi ako reo me ngā whakawhitinga pai mō ngā tamariki me ngā whānau. (1.2)</li> <li>» Te waihanga tohutohu mō te rahi ā-rōpū, te hoahoa o te pokapū me ngā āhuratanga ā-taiao whānui ake, ā, me pēhea te whakapai ake i ngā paerewa kounga i ēnei wāhi. (1.3)</li> <li>» Te tautoko i ngā mātua me ngā whānau ki te whiriwhiri i ā rātau ara akoranga mātauranga me te reo mā te āhei atu ki ngā mōhiohio pai ake. (1.4)</li> </ul>	<ul style="list-style-type: none"> <li>» Te arotake i ngā tuku pūtea ōrite me te hāngai hei whakarite kia pai rawa te tautoko i ngā tamariki kia whai hua mai i ngā wheako akoranga kōhungahunga kounga tiketike. (2.1)</li> <li>» Te waihanga i ngā tohutohu ki te takawaenga i ngā ratonga pāpori tauawhi hei tautoko i ngā tamariki me ō rātau whānau me te whakarite e marama ana kei a wai te kawenga mō te whakariterite i ngā tautoko akoranga kei ia ratonga akoranga kōhungahunga. (2.2)</li> </ul>	<ul style="list-style-type: none"> <li>» He whakapoapoa mō te 100 ōrau, ā, kia whakaritea mō te 80 ōrau o ngā kaiako whai tohu i roto i ngā pokapū whai kaiako, e eke ai te 100 ōrau. (3.1)</li> <li>» Te whakapiki i te taumata o ngā tohu kaiwhakaako ā-kāinga. (3.2)</li> <li>» Ka waihanga i tētahi rautaki puna kaiako o te akoranga kōhungahunga e hāngai ana ki te rautaki ohu mahi mātauranga whānui. (3.3)</li> <li>» Te whakatinana i tētahi tikanga ka whakapiki i ngā taumata me te ōritetanga o ngā utu ā-tau a ngā kaiako me ngā āhuratanga puta noa i te rāngai akoranga kōhungahunga. (3.4)</li> <li>» Te whakapai ake i te Mātauranga Kaiako Timata hei whakarite kei te tino whai tohu ngā kaiako ki te whakatinana i te marautanga i te taha o ētahi atu ngaio. (3.5)</li> <li>» Te waihanga i tētahi ara pūmau, whakaraupapa hoki mō te whakawhanaketanga me te akoranga ngaio. (3.6)</li> <li>» Te waihanga i ngā pokapū auaha me te rangahau mō ngā ratonga akoranga kōhungahunga. (3.7)</li> <li>» Te tautoko i ngā ratonga akoranga kōhungahunga kia whai wāhi atu hei pātui tōkeke i roto i te mahi ngātahi puta noa i ngā ratonga me ngā rāngai. (3.8)</li> <li>» Te tautoko i te ohu mahi ki te whakauru mai i te reo Māori ki roto i ngā ratonga akoranga kōhungahunga katoa. (3.9)</li> </ul>	<ul style="list-style-type: none"> <li>» Kāhītitia te pou tarāwaho marautanga, <i>Te Whāriki</i>, hei tautoko i te whakamahi i ngā mātāpono, ngā aho, ngā ūnga me ngā putanga ina waihanga ana i ngā marautanga paetata. (4.1)</li> <li>» Te waihanga ngātahi i ngā tūmomo utauta tika, whaikiko, tōtika ā-ahurea me te reo hei waihanga, e ū ana ki ngā tikanga me te reo hei tautoko i ngā aromatawai whakawhanake me ngā tikanga whakaako. (4.2)</li> <li>» Mā ngā ratonga tautoko hei whakahaere i ngā arotakenga ā-roto pakari hei whakakaha ake i te whakatinanatanga o <i>Te Whāriki</i> me te whakarite kia pai haere tonu ai. (4.3)</li> </ul>	<ul style="list-style-type: none"> <li>» Te whakauru i tētahi ara kōtuinga ka whakahaeretia hei whakarite i te tino kounga, te kanorau me te toitūtanga o te whakaratonga akoranga kōhungahunga. (5.1)</li> <li>» Te tautuhi i ngā kōwhiringa hei whakarite i te rato o ngā ratonga akoranga kōhungahunga i roto i ngā hapori kāore i tino whiwhi i ēnei. (5.2)</li> <li>» Te wehe mai i tētahi wāhi mō ngā ratonga akoranga kōhungahunga i te taha o ngā wāhi kura tuatahi, ina taea ana. (5.3)</li> <li>» Te whakakaha ake i ngā tautoko mā ngā poari, rōpū whakahaere hoki mō te reo o Te Moananui-a-Kiwa me ngā ratonga akoranga kōhungahunga. (5.4)</li> <li>» Te whakauru mai i tētahi kaupapa ōrite me te pakari mō te aroturuki me te tuku raihana. (5.5)</li> <li>» Te whakapai ake i te pūrangiaho tuku pūtea mā ngā mātua, ngā kaiako me te kāwanatanga. (5.6)</li> <li>» Te waihanga ngātahi i tētahi taura tuku pūtea me Playcentre Aotearoa New Zealand. (5.7)</li> </ul>

Kei roto ēnei i te Kaupapa Mahi Mātauranga a te Kāwanatanga e hāngai ana ki te mahere mahi akoranga kōhungahunga:

- Te Rautaki Ohu Mahi Mātauranga
- Mahere Mahi Tautoko Akoranga 2019-25
- Ka Hikitia me Tau Mai Te Reo
- Mahere Mahi mō Te Mātauranga Te Moananui-a-Kiwa
- Kaupapa Marautanga, Anga Whakamua me te Whakatutukitanga
- Ngā Kaupapa Matua ā-Motu mō te Mātauranga me te Ako (NELP)